



Meeqqamik najorteqartarneq

Meeqqat tamarmik angajoqqaaminnik, najugaqatiginngisaminnik najorteqarsinnaatitaapput.

| Kalaallit Nunaanni Eqqartuussiviit |

NAJORTEQARTARNEQ SUNAAVA?

Meeqqap angajoqqaaminut atassuteqarnissaa meeqqamut pingaaruteqarpoq. Aamma taamaappoq angajoqqaat najugaqatigiinngikkaluarpataluunniit. Eqqartuussisoqarfiulli angajoqqaq pinngitsaalillugu meeqqaminik najorteqartissinnaanngilaa.

Angajoqqaajusut isumaqatigiissinnaangippata angajoqqaq, meeqqamik najugaqatiginninngitsoq eqqartuussisoqarfimmi suliassanngortitsisinnaavoq.

Ilaqutariit periarfissaat apeqqutaatillugu najorteqartarneq pisassaaq. Nunatsinni illoqarfiit akornanni angalanissaa ajornaatsuunngilaq, taamaattumillu meeraq angajoqqaaminut, najugaqatiginngisaminut, akuttusuumik tikeraartarsinnaavoq. Taava oqarasuaatikku internetikkulluunniit najorteqartarnissaa pillugu eqqartuussisoqarfik aalajangeeqquneqarsinnaavoq.

Eqqartuussisoqarfik suliamik aalajangiilerpat eqqartuussisut isiginiassavaat meeqqap atugarissaarnissaa aamma angajoqqaaminik najorteqarsinnaatitaanera.

Angajoqqaat najorteqartarnerup qanoq ingerlanissaa isumaqatigiissutigigunikkut eqqartuussisut attaveqarfigissanngilaat.

Isumaqatigiissinnaanngikkussi aatsaat eqqartuussisut attaveqarfigissavasi.

Illuatungeriit attaveqaataat najugaqarfiilu eqqortut suliassanngortitsissummut allannissaat pingaaruteqarpoq.

Taamaangippat suliassanngortitsissut itigartitsissutigineqarsinnaavoq.

NAJORTEQARTARNEQ PILLUGU SUMI SULIASSISOQASSAVA?

Suliaq suliassanngortinneqassaaq eqqartuussisoqarfimmi meeqqap illoqarfigisaaniittumi.

SULIAP INGERLANNEQARNERA

Eqqartuussisoqarfiup suliassanngortitsissut tigoreeruniuk illuatungiusumut nas-siutissavaa, piareersaataasumik eqqartuussinissamut aggeqqussissut ilanngullugu.

Illuatungiusoq eqqartuussisoqartinnagu allakkatigut akissuteqarsinnaavoq. Akissuteqaat eqqartuussisoqarfimmut, aggersaasumut, nassiunneqassaaq.

Piareersaataasumik eqqartuussineq tassaavoq eqqartuussisumik oqaloqateqarneq. Eqqartuussisup illuatungeriit malittarisassat suliallu ingerlanneqarnissaa pillugit ilitsersorsinnaavai. Ataatsimiittoqarnerani eqqartuussisoq naliliissaaq

paasissutissat suut suliami piniarneqassanersut. Paasissutissat piniarneqarsinnaasut suunersut ataani takusinnaavat. Illuatungeriit piareersaataasumik eqqartuussinermi isumaqatigiissappata suliaq tassani naammassineqarsinnaavoq.

Illuatungeriit isumaqatigiinngippata suliaq kinguartinneqassaaq eqqartuussisut paasissutissanik piniareernissaannut.

Piareersaataasumik eqqartuussisoqarnerani isumaqatigiissutigineqassaaq qaqugu suliami eqqartuussutissamik isumaqatigiinniuteqartoqassanersoq. Eqqartuussutissamik isumaqatigiinniuteqarneq suliaq eqqartuussisunit aalajangiivigineqartinnagu ataatsimiinneruvoq kingulleq.

Illuatungeriit eqqartuussissuserisoqarpata, eqqartuussissuserisui eqqartuussinerni tamani peqataassapput.

SULIAP PAASISSUTISSARTAI

Eqqartuussisoqarfik piareersaataasumik eqqartuussinermi aalajangiisinnaavoq paasissutissanik amerlanernik piniartoqassasoq:

- Meeqqanut ilaqtariinnut il.il. Kommuniq ingerlatsivianiit oqaaseqaatit.
- Meeqqaqarivimmiit atuarfinniillu oqaaseqaatit.
- Meeqqamik oqaloqateqarneq psykologi, meeqqanik oqaloqateqarnermik sungiusimasalik, peqatigalugu. Meeqqat arfineq-marluk missaannik ukioqaleraangata oqaloqatigineqartarput.
- Suliani, misissueqqinnissamik pisariaqartitsiffiusuni, eqqartuussisut meeqqanik sullissinermik ilisimasalimmik misissuititsisinnaapput. Suliat taamaattut sivilisunerusumik naammassiniarneqartarput, psykologi meeqqap qanoq inneranik sukumiisumik misissuissammat.

PIFFISSAQ SULIAP SULIARINEQARNERANUT ATORNEQARTOQ

Suliaq eqqartuussisoqarfimmi tiguneqarneraniit qaammatit arfinillit iluini naammassineqarnissaa eqqartuussisoqarfiup anguniagaraa.

NAMMINEQ ANINGAASARTUUTIGINNGISAMIK EQQARTUUSSISULERSUUSSINEQ

Eqqartuussissuserisumut akissaqanngikkaanni nammineq aningaasartuutiginngisamik eqqartuussisulersuussinissamik qinnuteqartoqarsinnaavoq.

Nammineq aningaasartuutiginnngisamik eqqartuussisulersuussinissaq Kalaallit Nunaanni Naalagaaffiup Sinniisoqarfianut qinnutigineqarsinnaavoq, oqa.: 321001. nittartagaq: www.stm.dk

Nammineq aningaasartuutiginnngisamik eqqartuussisulersuussinissamut akueritikkaanni naalagaaffiup eqqartuussissuserisumut aningaasartuutit akilissavai. Nammineq aningaasartuutiginnngisamik eqqartuussisulersuussinissamik akuerisaasup nammineq eqqartuussissuserisoq, ikiortigerusutani, attaveqarfigissavaa. Eqqartuussissuserisoq eqqartuussiviit nittartagaani www.eqqartuussivik.gl-imi naniuk.

ATTAVEQARFISSAQ

Arlaannik nalornissuteqaruit imaluunniit ilitserorneqartariaqaruit paasissutissat amerlanerit uani takusinnaavatit: www.eqqartuussivik.gl imaluunniit eqqartuussisoqarfik sianerfigisinnaavat: 36 38 00